

0,00 €

#17 - Estate 2013 - Tutti i trè mesi - www.apiazzetta.com

A PIAZZETTA

GIURNALE SCHERZOSU PULITICAMENTE SCURRETTU È CERTE VOLTE APPENA GATTIVU



30 lochi

à visità per amparà a storia

di a Corsica



Stu numeru hè dedicatu à Dumè Gallet

A Corsica

ùn hè più à vende

Un magagnone si face passà pè l'avucatu Kiejman è prupone di vende a Corsica. Ùn vale a pena di ride, hè digià guasi tuttu vindutu.



U fucarè di l'Acapulco

Piccia a buatta di Calvi : custerazione è addisperu nant'à Facebook è Twitter. A vigilia un omu hè statu tombu, nisuna riazione. Tuttu v à bè.

Ùn sò micca tutti in Sant'Ornellu

Joseph Colombani à Cuntrastu nant'à Via Stella : « *Quand le prix de la terre, passe de 15 centimes d'euros non constructible à 300 euros, ça rend fou* ». È disgraziatamente ùn sò micca tutti chjosi in Sant'Ornellu.

666 number of the beast

U club di Newcastle batte un record in a so partita in casa contr'à Liverpool. Pè a prima volta in u campjunatu inglese, una squadra face ghjucà sei ghjucadori di a listessa naziunalità. Anu persu 6 à 0. I ghjucadori eranu francesi.

In Francia, si ghjoca à u futbol un 5 di maghju è Leonardo ne prufitta pè scuzzulà un arbitru in i curridori di u Parcu di i Principi. Bella fiura di u futbol francese.

« A so amica era troppu bella : a tomba »

Una chinese di dodeci anni tomba a so amica, li taglia u capu è e bracce, à u mutivu ch'ella era « *più bella, più magra è più popolare chè ella* ». L'umanità v à megliu.



PSG, culturamente viulente

Surpresa, u PSG hè campione. À u Trocadéro, a festa gira à u fiascu. 30 feriti, 21 interpellazione. Chì dicia Valls nant'à a viulenza ?



Georges Mela Spirit

In America centrale, una piràmida Mayà hè distrutta per custruisc un'autostrada. Georges Mela Spirit : « *on ne va pas laisser que des pyramides à nos enfants* ».

Ça devait créer des emplois

« *Hôtels de luxe : suppression de 110 postes en Corse* » (France 3). Ancu di grazia chì u turisimu di lussu avia da creà impieghi.

A magia di Disney

In America di u Nordu, v'è megliu dinù.
« *Disney World: ils louent des handicapés pour éviter les files d'attente* » (Huffington Post).

Circate l'errore

Un focu di rumenzule in Bastia dop'à una manifestazione : dui cummunicati di cundannazione.
Un omu assassinatu in Muriani : nunda.

Contru à a cuufficialità

À a CTC, 110 amendamenti sò stati posti pè impuzzichisce u dibattitu nant'à a cuufficialità. Certi eletti sò veramente furtissimi pè discorre di lana capruna. Peccatu ch'elli ùn sianu cusì forti pè truvà e suluzioni à a bettunizazione è à a viulenza maffiosa ch'arruvina a Corsica.



Oasis azezu

Liam Gallagher hè azezu è a dice in The Sun : « *Fatela finita cun Daft Punk. Eu, averia scrittu st'album in un'ora!* ».

Manif pour tous

Per ùn fassi rimarcà, un pulizzeru pariginu in civile porta una vesta di treillis cù un ribellu. Logica (France 2)

Économie résidentielle

« *Forte hausse du chômage et effondrement des offres d'emploi saisonnières* » dice Corse-Matin. U mudellu dettu di « *l'économie résidentielle* » puntellu di u PADDUC, ch'ì prividia di sviluppà a Corsica cun solu u turisimu, a cunsumazione è u BTP si sprufonda.



Instagram

« *Bouge pas frère, je me prends en photo avec toi* »



Flic et voyou

« *Un journaliste de France 3 Corse blessé par un tir de grenade émanant des forces de l'ordre* » (Corse-Matin). Avà dunque a pulizza tira nant'à i giornalisti. Tuttu v'è bè.

In vino veritas

« *Jean Dujardin condamné pour une nuit d'ivresse à Porto-Vecchio* » (Corse-Matin). Camille hà dettu ch'ellu ùn c'era per nunda sta volta.

Derrick faccia parte di i Waffen SS

Cunsternazione ind'è i vechji chì fidighjavanu a tv u dopumeziornu : s'ampara chì l'attore chì ghjucava à Derrick, Horst Tappert faccia parte di i Waffen SS.



Furmazione di giurnalistu bislingu

Aprènu e scizzioni per una furmazione in Corti di giurnalistu bislingu, in partenariatu cù una scola di giurnalisimu di Lille. Dece studienti seranu ricrutati è seranu siguri di truvà un travagliu in i media corsi. Forse chì a lingua corsa ùn ghjova à nunda, ma permette di truvà un mistieru.

Cumplimenti

« Portivechju champion de France de la hausse du chômage » (Alcudina.fr).

Lingua corsa : Valls chjode a porta di u dibattitu

Duie settimana dop' à u votu storicu di a CTC, Manuel Valls chjode tutte e porte : « Il n'y a qu'une langue de la République, c'est le français » (Corse-Matin). È s'ellu era ellu u peghju ministru di l'internu dopoi vint'anni ?

Da a fica à u peru

Sempre Valls, in visita in Corsica : « j'aime la Corse, j'aime les Corses, j'aime la culture corse ». Li piace a cultura viulente dunque ? O Manuè, forse ne faci appena troppu avà...

Demucrazia ?

À l'elezzioni municipali in Sicilia, un votu costa 10 € (La Repubblica). Ma qualcosa cusì ùn accaderia mai in Corsica. Nò ?



Arinella beach

« Manuel Valls promet un Tour de France hautement sécurisé en Corse... avec 1 000 policiers et gendarmes en renfort » (Corse-Matin). Ùn si sà micca s'elli si ne sò andati dopu.



Diaspora

« Sò corsu, aghju l'autocollant »



Didier Rey à Cuntrastu

« Si vous émettez une critique à l'égard du TourDeFrance vous méritez le peloton d'exécution. Pourtant il y a de quoi s'interroger ». Ma Giacobbi hà dettu chì « ceux qui émettent des critiques envers le Tour de France ont un problème avec la vie ».

Sempri azezi

« L'Aude socialiste boycotte le gouvernement » (Marianne.fr). Azezi perchè u prugettu di TGV ùn prevede micca di passà pè ind'è elli, l'eletti PS lucali ùn riceveranu più nisun membru di u governu. È quì ?

Leonidas

400 persone in Evisa si mobilizeghjanu contr'à e violenze maffiose in Corsica. Si move a sucetà civile contr'à stu càncaru. U principiu di qualcosa ?



Hasta siempre presidente

Paul Giacobbi, scatinatu à a CTC parla di « l'arrogance » di a Francia : « Si la France était un pays normal, il n'y aurait pas de difficulté (...) mais elle n'est pas un pays normal (...) et a une sorte d'intolérance à la diversité et à l'identité de ses régions ».




Mafia blues

I stessi sostenitori di Monaco anu u sensu di a magagna. Accoglianu à Thiriez in Parigi cù un striscione « LFP = mafia ». U presidente russiu Rybolovlev hà sicuramente apprezzatu.



Fate pianu nant'à a strada

« Une Australienne attrape l'accent français après un accident de la route » (Libération). Attenti à voi.



A fiura a più vista nant' à a pagina Facebook d'A Piazzetta : u cavaliere di u Falasorma.



A fiura a più commentata nant' à e rete suciale : u bumbagiu tamantu #CorsicalsNotFrance fattu in una notte in Bastia.



A RIAZIONE

Quella di u ciclistu **Samuel Dumoulin** : « *je m'attendais à plus de monde en Corse, avec plus d'engouement. Le public n'a pas été au rendez-vous. Ce n'était pas trop une ambiance Tour de France* ». Hè cusì chì ellu a risente. Scambia di ciò chì s'hè intesu è lettu in i media corsi.

SUCCESSU DI U TOUR DE FRANCE

Sò numerosi i Corsi davant' à a so tv. Scoprenu a so isula ch'elli cunnoscenu male è ch'elli trovanu cusì bella. S'elli pudianu piglià cuscenza dinù ch'ella hè minacciata è ch'ellu ci vole à prutegela...



A FRASA

Andy Schlek dichjara à a fine di e trè tappe in Corsica chì avà hà da attaccà « *la vraie France* ». Seranu quesse e prime « *retombées médiatiques* » tantu aspettate.



A fiura chì hà fattu u giru di u mondu : u bus di a squadra Orica GreenEdge chì hà impuzzichitu a linea d'arrivu in Bastia. « *Arrivée calamiteuse* », « *chaotique* », « *du jamais vu en 100 ans de Tour de France* »... è ùn hè mancu colpa nostra sta volta !

UP and

DOWN



↓ Alex Alessandrini

Campione di u mondu di a cacciata di l'annu : « *le bilinguisme conduit à l'indépendance* » (Corse-Matin).

↓ Jean Zuccarelli



Vice-campione di u mondu, nant'à Via Stella : « *oui le bilinguisme conduit à l'indépendance, heu... enfin non la coofficialité.* »

↓ Georges Mela

Torna ellu. In piena forma u merre di Portivechju hà cacciatu chì : « *le Tour de France, c'est 15 millions d'euros de retombées économiques immédiates* » (Eurosport.fr).
Perchè arrestassi à 15 solu, postu ch'ellu ùn si puderà micca verificà ? A prussima volta ch'ellu dica puru ch'ellu ci serà 100 milioni, ci serà sempre un elettore per credelu.

↓ CFR Tribute

Un grande mumentu di l'association France-Corse chì ricunnosce infine chì a Ripublica hà stirpatu a lingua corsa : « *Je salue tous nos anciens professeurs qui nous ont punis lorsque nous parlions le corse pour que nous puissions bien parler français et travailler sur le continent ! C'est grâce à eux que nous avons pu nous élever !* » (cunferenza di stampa rapurtata da Corse-Matin).

↓ François Fillon

L'anzianu primu ministru hè vultatu nant'à a so frasa « *Je suis à la tête d'un Etat qui est en situation de faillite sur le plan financier* » in u 2007 chì avia fattu scàndalu. Spiegazione : « *on avait bu un peu trop de rosé corse* ». Seremu culpèvuli di tutti i peccati di l'umanità ?

↓ François Tatti

Anch'ellu hè statu « suspendu à titre conservatoire ». U PRG li lascerà omancu presentassi à a merria di Gueugnon ?

↓ Trè lonzi, piazza Santu Niculà



↑ Sophie Olmiccia



U bellu tempu hè di ritornu è era ora. Bon in fatti era ghjustu per mette u ritrattu d'una bella zitella. Ci scambia.

L'INVASIONE DI I CLUBS CORSI

Quist'annu, pè a prima volta ci seranu
quattu clubs corsi professionali.

Thiriez scimisce digià.

À quandu l'altri ?



FR.



ING CENTURI

ELLARI LURI

MINATORI

NEBBIU

CAVADU RICUPERATA

SPARTAK MACINAGHJU

TOPI SISCHESI

TIGHJIME RUMENZULAGHJI

BASTIA

LOKOMOTIV PONTE LECCIA

CHJURLINU ZINZALE

MANZI DI FRANCARDU

MERUSAGLIA PAULINI

GHJUCATOGHJU PULENDAGHJI

PARTIZAN PERU CASEVECHJE

BOCCA À U PRATU JUNIORS

CELTICS LINGUIZZETTA

BUSTANICU DEBROUSSAILLORS

GHJUVENTUS D'ALERIA

BAYERN GHISUNACCIA

VENACU PAULISTI

ATLETICU RUSPIGLIANI

MACHJAGHJOLI FIUMURBACCI

GALATASARAY ALTA ROCCA

COSMOS DI ZONZA

PORTOVEK ROKASERS

RED STAR ZERUBIA

GHJADDINAVARGHJA FC



30

lochi

pè scopre a storia di a Corsica

A Corsica ùn hè solu sole è mare, dice una canzona di i Muvrini scritta da Ghjuvanteramu Rocchi. È s'è vo prufittavate di l'estate pè scopre a so storia è u so patrimoniu ? Eccu una scelta di trenta lochi induv'ellu si sente u soffiu di a storia. Siguramente incumpleta, micca sempre bella, troppu spessu scunnisciuta, eccu una spassighjata in u tempu.

► PRESTORIA

Paddaghju (in Sartè) : A passione corsa pè l'immobiliare hà 6000 anni. A sapiate chì in Corsica ci hè a più grande concentrazione di stantare ? Si passa in Sartè, u locu si chjama Paddaghju, vicinu à Tizzà. Sò state ricensate 258 petre zuccate arritte o chjinate. Da vede dinù : Filitosa (in Suddacarò).

Casteddu d'Araghju (in Portivechju) : In Portovèk ùn ci sò micca chè residenze secundarie pè ricchi. Ci sò dinù residenze principale di i tempi preistorichi. U Casteddu d'Araghju hè un bellu esempiu di i castelli preistorichi di l'età di u bronzu. Tandù l'omi cummencianu à organizzassi in gruppi umani sott'à l'autorità d'un capimachja. U principiu di u clanu, in fatti. Da vede dinù : u situ di Cucuruzzu (in Livia).

Quì ci hà campatu un orcu (Monte Rivincu)



A più grande concentrazione di stantare di u Mediterraniu in Paddaghju



U Casteddu d'Araghju



A Casa di l'Orcu è a Casa di l'Orca (Santu Petru di Tenda) : À u Monte Rivincu in l'Agriate, a legenda dice chì custi ci campava un orcu abbastanza gattivu. Un ghjornu, i pastori nebbisginchi anu tesu una trappula per chjappallu, mettendu un scarpu cù pece (poix). L'orcu s'hè ritruvatu intrappulatu, u pede incullatu in u so scarpone. Per pruvà di salvà a so vita, l'orcu disse à i pastori un secretu : a manera strana è dillicata di fà u brocciu. L'orcu

hè statu tombu, ma dapoi i pastori sanu cum'ellu si face per fà stu furmagliu particolare. In u Nebbiu ci sò dinù parechje stàntare da vede, ch'ellu sia in Patrimoniu, San Gavinu, Santu Petru è in Pieve.

Petra Frisgiata (Cambia) : Ch'averanu vulsutu di l'omi prestorichi ch'è anu zuccatu u scogliu di a Petra Frisgiata, in u Vallerustie ? Si ponu vede seicentu piccule croce, tracce è segni. I primi bumbagi corsi.

▶ ANTICITÀ

Aleria : Cumu ? Òn site mai andati à vede u situ è u museu d'Aleria ? Custi v'aspettanu 10.000 anni di storia. Presenza prestorica, etrusca, cartaginese, greca è infine rumana anu fattu d'Aleria un locu carcu di storia. Peccatu di passà à cantu senza vedelu.



A bella collezione di ceramica antica di u museu d'Aleria : u «rhyton» in forma di cane



A Corsica, i Grechi ùn l'anu mai chjamata «Kalisté», ma «Kurnos». Face menu bè pè i turisti.

Mariana (Lucciana) : Una grande parte di a città antica hè sempre sottu terra. Forse i figliulini di i vostri figliulini a videranu un ghjornu. Òn semu più à aspettà 1000 anni in più o in menu.

Piantaredda (Bunifaziu) : À cant'à e villà di ricconi ch'è vanu à ghjucà à u golf ci hè un situ anticu. Trista sorte pè stu situ anticu. E custruzzioni illegali anu dunque più di 2000 anni.

A carta di Tulemeu : À u segondu seculu, u geografu d'Egittu Claude Ptolémée decide di fà una carta di l'Imperu Rumanu. Stu documentu preziosu ci dà una quantità di nomi di lochi. Tulemeu parla di «dodeci populi» ch'è campanu in l'isula. Certi di sti nomi si ritrovanu sempre avà : in u nome Tarrabenoì si ritrova quellu di Tàravu. Quellu di i Koumasenoì si ritrova quellu di Cuvasina (in Fiumorbu). In Talkinon si ritrova u nome Tàlcini (u nome di a pieve di Corti, Tralonca, Omessa, Castirla è Suveria). A prova ch'è certi nomi di stu paese sò antichi assai.

▶ MEDIEVU

San Chirgu di Cambia è San Mighèle di Muratu: E chjese rumàniche di Corsica sò troppu spessu scunniscute è certe si ne vanu in ruvina. Frà e numerose bellezze, e duie perle sò e chjese di Cambia è di Muratu. Ma ci n'hè tante altre, custruite sott'à Pisa trà i seculi X è XII. Da vede dinù : quelle d'Aregnu, di a Canònica, di Carbini, di A Casalta... Circate bè, ogni pieve hà e so ricchezze.

Detaglii di a magnifica chjesa rumanica di San Chirgu di Cambia



Àlandu : Da u paisolu d'Àlandu in a pieve di Boziu hè partuta a rivolta anti feudale in u 1357. U so capimachja era un tippettu ch'è si chjamava Sambucucciu è tutti i castelli di Corsica seranu lampati in pianu è brusgiati. In Capicorsu è in Corsica Suttana i signori si manteneranu, hè a Terra di i Signori. Trà i dui ci serà a «terra del comune» (è micca di u cummunu !). Vole di ch'è ste pievi seranu messe sott'à a prutezzione di a cumuna di Genova, è più sott'à l'autorità di i signori. Ma più tardi i «capurali» piglieranu pocu à pocu a piazza di i signori.



Statua di Sambucucciu d'Àlandu, in Boziu

U castellu di Serravalle (in Pratu di Ghjuvellina): Vulete vede ciò ch'ellu era un castellu corsu medievale? Andate à vede quellu di Serravalle, trà Ponte Leccia è Francardu. Hè unu di i più belli è di i megliu cunservati.



U Castellu di Serravalle, pieve di Ghjuvellina

A citatella di Corti: Vincentellu d'Istria (1380-1434) era un capimachja guerrieru scatinatu chì hà passatu a so vita à scumbatte contr'à Genova. Conte di Corsica, partigianu di u rè d'Aragonu, hà pigliatu u castellu di Biguglia è hè ellu chì face alzà a citatella di Corti.

► L'EPUPEA PAULISTA u seculu di e rivuluzioni

Bustanicu: Hè da stu paisolu buzincu ch'ella parte a grande rivuluzione di u XVIII^u seculu. In u 1729, i Genuvesi collanu in Bustanicu pè raccoglie un impositu novu è maltrattanu un vechju paisanu, un certu Defranchi chjamatu Cardone. I Genuvesi ripartenu à calci in culu è principia a rivolta. Sonanu e campane è a ribellione tocca pocu à pocu tutte e pieve in giru, da Tavagna à Casinca. Azezi, i paisani attaccanu i Genuvesi pè ripiglià e so terre. Finisceranu per assaltà à Bastia (a dice a canzona A Palatina). A situazione si calma, ma per pocu tempu: hè principiatu u seculu di e rivuluzioni.

A Stretta (Merusaglia): In stu paisolu à fianc'à u San Petrone hè natu in u 1725 u più grande omu di a storia di a Corsica.

U Cunventu d'Orezza (in Pedicroce): Hè custi ch'ella nasce a prima custituzione corsa, di ghjennaghju 1735. Sott'à l'autorità di trè capimachja (Andria Ceccaldi di U Viscuvatu, Ghjacintu Paoli di Merusaglia è Luigi Giafferi di Talasani), una custituzione dice chì a Corsica un

hè più genuvese, ch'ella hè piazzata sott'à l'autorità di a Vergine Maria è chì l'ottu dicembre, ghjornu di a Cuncezzione, serà festa nazionale.

A casa di Napuliò (Aiacciu): À principiu, Napoleone Bonaparte era un ammiratore di Pasquale Paoli. Hà scrittu dop'à Ponte Novu: *«Je naquis quand la patrie périssait. 30.000 Français, vomis sur nos côtes, noyant le trône de la liberté dans des flots de sang, tel fut le spectacle odieux qui vint le premier frapper mes regards. Les cris du mourant, les gémissements de l'opprimé, les larmes du désespoir environnèrent mon berceau dès ma naissance.»* Dopu, l'omu si scurdò di a filetta è diventò maestru di u mondu.

U cunventu Sant'Antone di A Casabianca: Hè custi, in a pieve d'Ampugnani, chì da u 13 à u 15 lugliu 1755 una cunsulta eleghje un certu Pasquale Paoli generale di a Nazione Corsa. Dopu à avè fattu e so prove in Napuli (cum'è Maradona), l'omu apre un'università, face un'armata, una stamperia (in **Cervioni**) è una muneta (in **Muratu**), face piantà e vindette è si face rispettà da l'Europa sana. **U Palazzu Nazionale** in Corti diveneterà u so QG è a sede di u governu corsu.



U cunventu Sant'Antone di A Casabianca

U cunventu di Boziu (in Alandu): Pasquale Paoli era forte ma avia dinù parechji nemichi. U più cunnisciutu era Mariu Emmanuele Matra. In u 1757, Matra è i so partigiani chjappanu per sorpresa à Paoli in Boziu. Pasquale si chjode in u cunventu mentre chì i so nemichi danu l'assaltu. A fine pare vicina per ellu. Ma u rinforzu finiscerà per ghjunghje. Amparendu chì Paoli hè in periculu, a mamma di Tumasgiu Cervoni di



Suveria forza u so figliolu (chì ùn pudia pate à Pasquale) à purtà succorsu à u Generale. Paoli serà salvatu è Matra serà tombu. A storia dice chì Paoli hà pientu a morte di u so nemicu u più curagiosu.

Ponte Novu : 8 è 9 maghju 1769, cunniscite a seguita.

▶ A STRADA DI A RIPRESSIONE

Dop' à a conquista francese è a fine di u sognu paulistu cummencia una longa è sanguinosa ripressione. Certi chjameranu quessa «pacificazione». Cervoni scrive : «*en Corse on y fusille au moins un homme par jour*» . Berthier ch'ellu ci vole à «*battre la Corse avec une verge de fer*». Ma u bilanci di st'epica dura assai ùn hè mai statu veramente fattu da i sturiani. Eccu qualchi esempiu.

Di settembre 1769 in **Oletta** sò arrestati diciottu ribelli culpèvuli di cospirazione contr' à u novu pudere francese. Cinque omi sò marturiati è patenu u suppliziu di a rotula. I cadaveri sò spostati in paese è hè difesu à e famiglie di dalli una sepultura cristiana. E so case sò brusgiate. Ma in a notte, l'innamurata d'unu di st'omi, Maria Ghjentele Guidoni, v' à spiccà u corpu di u fidanzatu è l'interra di notte.



In u 1774, in Corscia, in a pieve di **Niolu** sò stati tombi ondec corsi, scelti per azardu. Sò sospettati di ribellione. U più giovanu avia quindeci anni. Hè u generale Sionville chì sceglie i ghjamboni di i castagni induve sarianu impiccati l'omi. Seranu spostati à a pupulazione durante qualchi tempu.



A prigiò di la Grande Tour in Tulò. Cun quella di u Fort Lamalgue, sò state centinaia di Corsi à avelle visitate sott' à a ripressione francese.


U generale Marbeuf serà l'artigianu di sta terribile ripressione. Face imprigiunà, tumbà, impiccà, brusgià i paesi, pruibisce a cultura di u castagnu chì «*encourage la fainéantise et est très nourissante*». In a so corrispundenza parla di i Corsi cum'è una «*race exécrationnelle*» è dice : «*les officiers français regardent les Corses comme un amas de paysans qui devraient trembler et s'humilier lorsqu'ils ont l'honneur de leur parler*». Pè ringrazià tutti st'onori, i cerbelloni lucali danu u so nome à u **Lycée Marbeuf** in Bastia, è à duie **rues Marbeuf** in Aiacciu è Bastia. Normale.

In u 1775 si ne piglia à i pastori fiumurbacci culpèvuli d'un vulè sottumettesi. Marbeuf prumette l'amnistia à i ribelli chì renderanu l'arme. 92 omi accettanu è sò adduniti in **U Lugu di Nazza**. Hè un veru macellu. Sò tutti scannati. Per copre i stridi di i disgraziati, i suldati francesi facenu a musica è sonanu di cialamella. Hè cuntata in u voceru di Caninu.

In u 1775, si contanu 500 Corsi imprigiunati à u **Fort La Malgue**, in Tulò.

In u 1800, i paesi di **Prunelli**, **Ornasu** è **Isulacciu** sò brusgiati. Un cummandante scrive : «*les habitants de cette affreuse contrée qui vivent comme des arabes depuis qu'on a brûlé leurs habitations.*»

Sempre in Fiumorbu, u paese d'**Isulacciu** pagherà caru a so ribellione à a Francia. Simu vint'anni dopu à Ponte Novu ma u Fiumorbu ùn si vole micca sottumette. In u 1808, sott' à l'ordine di Morand, tutti l'omi di u paese sò cunvucati in chjesa di u paese. Era una trappula per imprigiunalli. 185 omi da 15 à 80 anni sò chjappi. Ottu seranu fucilati. U restu serà purtatu in a prigiò d'**Embrun** induve mureranu tutti. Sempre avà, un locu porta u nome di «*le cimetière des Corses*». Ùn anu mancu avutu dirittu à una sepultura degna di stu nome. •



CHUCK NORRISATE

Si Chuck Norris fussi statu in Ponte Novu, a lingua francese saria dichjarata « *in perditione* » da l'Unesco.

Chuck Norris hà digià cuntatu sin'à l'infinitu. Duie volte.

U solu locu induve si pò pichja à Chuck Norris, hè nant'à Google.

Chuck Norris hà messu una capata à l'omu di Cagna.

Certi mettenu un pyjama Superman. Superman ellu mette un pyjama Chuck Norris.

Chuck Norris dà spessu u so sangue à a Croix Rouge. Ma ùn hè mai u soiu.

Chuck Norris trova una piazza à Paul Giacobbi.

Un ghjornu, una muntagna si n'hè risa di Chuck Norris. Dapoi, si chjama « *Capu Tafunatu* ».

L'Agriate si sò fatte chjamà « *disertu* » dop'à u passagiu di Chuck Norris.

Quando Chuck Norris decide di piglià u battellu, a SNCM ùn face micca greva.

Si Chuck Norris era à u PRG, averia organizatu un'elezione primaria pè a merria di Bastia. In a cascia di François Tatti.

Un ghjornu, Chuck Norris hà fattu un bracciu di ferru cun Superman. Quellu chì perdia duvia mette un slip rossu sopr'à u so pantalone.

Si Chuck Norris era un Ponte Novu, Emile Zuccarelli diceria chì « *la violence est ancrée dans culture française* ».

ABBUNATEVI

SUSTENITECI !

PUBBA ?

A Piazzetta sorte tutti i trè mesi.

Abbonamentu : 4 nùmeri, 15 € sustegnu, 30 €
Cummandà i vechji nùmeri : 20 €

nome _____
casata _____
indirizzu _____

Mandate u vostru sceccu à l'ordine di : Associu Lingua Scritta •
1, carrughju Canònicu Bartoli • 20200 Bastia

Per avè
a vostra publicità
in u giornale,
cuntattateci :
apiazzetta@free.fr

Diffusione in tutta a Corsica
15 000 esemplarii



smirallu®

PEPPERMINT

Le vert vous va si bien



L'abus d'alcool est dangereux pour la santé. A consommer avec modération.

Nant'à internet



apiazzetta.com
2 500 visitatori
à ghjornu



10 000 fans



3 900 followers

Avete l'appli ?



Site digià 20 000!
(iPhone, iPad,
Android, WP7)

A Piazzetta hè un giornale gràtisi chì esce tutti i trè mesi, publicatu grazie à u premiu Ghjovani in Mossa, l'Università di Corsica, a Corsica Ferries è a Fondazione di Corsica. I soldi raccolti da e pubblicità è da l'aiuti ci permettenu di pagà unicamente l'impressione di stu giornalettu.

Hè editatu da : L'associu Lingua Scritta - 1, carrughju Canònicu Bartoli - 20200 Bastia

Hè statu stampatu in Corsica à 15 000 esemplarii.


Stamperia AZ Diffusion - Erbaghjolu - 20600 Bastia
Capiredattore : PPC -
Redazione : PPC, AZ, MTG -
Infograffista : PFC, FR -
Macchetta : PFC, VB
Cuprendula : Flora Ambrosini
www.kalli-graphic.com
ISSN : 2101-9193 - www.
apiazzetta.com



Ringraziamu
à l'Unione
Corsa
d'Antibes per
u so aiutu.

u disegnu di Lawra

<http://lawra.fr>



Site in
casa vostra !



A lingua hè viva...
ci tocca à partà

VITO

CORSE

VITO. Vous êtes chez vous.



Des entrées
gratuites
et des réductions
pour les
sorties culturelles

BD

LIVRES

MUSÉES

CINEMA

THÉÂTRE

FESTIVALS

DANSE

CONCERTS



Plus d'infos

N° Vert 0 800 001 004

APPEL GRATUIT DEPUIS UN POSTE FIXE

www.passcultura.corse.fr

les pass
c'est trop maC!